

Ақын мұрасы ұлықталды

Арқалық қаласындағы Дала өлкесі тарихы облыстық мұражайында халық ақыны Жұмабай Шалабайұлына арналған «Киелі сөздің ат байлары» атты мұражай сағаты өткізілді.

Мұражай сағатына ақынның аталас туысы Торғайбай Уәлиұлы қатысып, Жұмабай ақын жайлы деректерімен бөлісіп, алдағы уақытта Арқалық қаласында «Ақындар алейасы» ашылып, Уақ Жұмабай ақынның мүсіні орнатылатынын жеткізді. Мұражай сағаты барысында ақынның өміріне қатысты тың деректер айтылып, шығармалары талданды.

Аталмыш іс-шара №2 облыстық ғылыми-әмбебап кітапханада жалғасын тауып, ақын мұрасының жоқтаушысы болып жүрген Торғайбай Уәлиұлы мен бірге Торғай ақындық мектебін зерттеу нысаны еткен ф.ғ.к Айбек Киікбайұлы сөз алып, Жұмабай Шалабайұлының шығармашылығының ерекшеліктері туралы айтылды.

Уақ Жұмабай Шалабайұлы Торғай облысы, Жангелдин ауданына қарасты Тосын болысының № 5 ауылында 1838 жылы дүниеге келген. Ақын шығармаларынан осы күнге жеткені Нұрғалимен, Нұржан Наушабаевпен айтысы, көлемді шығармаларына «Абылай-Ке-



несары» жырының үзіндісі мен «Табын мен Дүзей соғысы» атты толғауы және бірнеше толғау, термелері. Ел арасында «Өлеңші ата көрініп бата берген» деп аңыз болған Жұмабай ақын өзіндік дәстүр ерекшелігін қалыптастырған Торғай ақындық мектебінің ұстаздарының бірі болған тұлға. Жұмабай ақын шығармашылығы Ахмет, Міржақып секілді алаш арыстарының көзқарасының қалыптасуына ықпал жасағаны туралы деректер де кездеседі. Ақын мұрасы жайлы алғаш Н. Бектемісовтің «Ахмет ұшқан алтын ұя» кітабында айтылып,

кейін С.Оспанов, Б.Әлмағамбет, С.Кенжеахметов, А.Қалиев секілді ғалымдар мен жергілікті өлкетанушылар жазды.

Келер күндері қаламызда Ахмет өскен ақындық ортаның алтын қазығы болған Уақ Жұмабай Шалабай ұлының мүсіні орнатылмақ. Мұражай мен кітапхана төрінде болған іс-шаралар легі осы мүсіннің ашылуы алдында, ақын мұрасын елге насихаттауға арналып отыр.

Батырлан САҒЫНТАЕВ,
Облыстық «Дала өлкесі тарихы» мұражайының ғылыми қызметкері